

## Ọkwukwo izi Jemisi **Nhne gbasiri Ọkwukwo izi ka**

*Ọkwukwo izi Jemisi jihiaru n'agida ezni o nyernu kpakara rụmu Chiokike gbasarụ nụ “rime kpakara ọwa.” Jemisi ji agida nhne anya nqowhnu n'obochi neezni nhne ke enine, neegesi kpa nye Karaịsi kwesiri o ji akoniche wu bjudnu n'ọwa. Jemisi kwuru ọka gbasiri ọba eze, ọwa, ọrnurna, agwa ọma, okewa, ọkwnata mkpoma, riro, akoniche, okno ọka, oknomokno, ozi wohnernerne, okpe ele berere ikpe, nganga, ndidi nụ okpukpe.*

*Ọkwukwo izi ka nookwu mkpa ọ zi nụ badnụ nwernu ọkwnata mkpoma nụ nhne obula o neeme, lele kpa o kwesiri nye neekpenu Chiokike.*

### **Nhne zi n'ọkwukwo izi ka**

Ọpanizo (1:1)

Ọkwnata mkpoma nụ akoniche (1:2-8)

Ọdnu ọwa nụ eze (1:9-11)

Ornurna (1:12-18)

Ọnurnu nụ omume (1:19-27)

Ọdo aka nụ nsni gbasiri okewa (2:1-13)

Ọkwnata mkpoma nụ ẹrnu (2:14-26)

Nye Karaịsi nụ riro a (3:1-18)

Nye Karaịsi nụ ọwa (4:1---5:6)

Ezni zi ọdo nụ ọdo (5:7-20)

<sup>1</sup> Mawa, Jemisi, nye izi ke Chiokike nụ ke Nyenwe aị Jizosị Karaịsi, neebekwu kpakara ele ke

Chiokike, ke bụ avnūrnū nri nụ ẹbo ele Chiokike zì nụ rime kpakara ọwa.

### *Okwnata ovu n'ige ɔrnurna*

<sup>2</sup> Rūmu nda m, o bụru nhne snarnima ige ọbula anụ dnabnarnụ nụ nhne ɔrnurna zì ọdo n'ọdo. <sup>3</sup> Kwnornu nụ o bụ ọkpa ọkwnata ovu iru jeegweya ndidi. <sup>4</sup> Ndidi rnuzu ेrnu a, ma anụ bụru ele zuru ozu, o zá nhne kogwu. <sup>5</sup> O bụru nụ o zì nye nwée akoniche, nye wam rịo n'aka Chiokike, nye neenye kpakara badnụ hite nụ mkpoma ọma a, o zá naakpasị iwhnerne. O jeenye a. <sup>6</sup> Nye wam jeeji ọkwnata ovu nqorio, o nwékọ mkpoma lawuru. Nye nwernu mkpoma lawuru nụ lele abaka-mini osimini, nga ruwhere neewhe, o nqotulizo a olu. <sup>7</sup> Nye kị chékọ nụ o jeenwehịa nhne ọbula n'aka Nyenwe aị. <sup>8</sup> O bụ nyé mkpoma lawuru, o gwúzole kwem nụ kpakara apna a.

### *Odnà Ọwa nụ eze*

<sup>9</sup> Nnwọ nda ke bụ nyé mboni nwudna nga Chiokike gwelizoru a olu. <sup>10</sup> Nnwọ nda ke bụ nyé kwu nwudna nga Chiokike gwednarnụ a ẹli. Kwnornu nụ nyé kwu jaagawhe lele igwugwere ọhia. <sup>11</sup> Nga ẹhnam wasiri n'orne békwnu a, o chnagbu achara, igwugwere a dnahnala, mma a kwome masi. Kpam masi, nyé eze jaagawhe nụ kpakara ेrnu a.

### *Ornurna*

<sup>12</sup> Ngозi jaazinu nyé wam ovu a siri rikne nụ ige ɔrnurna, kwnornu nụ o megbu ɔrnurna, o jeenwehịa bùdnu kwó okwo ke Chiokike kweru ele whnūrnū a n'anya mkwna. <sup>13</sup> Nga be naarna

anụ ɔrnurna, nye wam kákwdia, “Chiokike naarna m ɔrnurna,” kwnornu nü o zá nye nwernu rikne rna Chiokike ɔrnurna, Chiokike rná badnụ ɔrnurna. <sup>14</sup> Kóvu be naarna badnụ ɔrnurna nga nhne ojo ke mkpومa nooto a, ma o duwhu a. <sup>15</sup> Nga nhne ojo ke mkpومa wam tñru rime, o muhia mmehie, mmehie masi sopyia, o muhia ẹnwu.

<sup>16</sup> Rñmu nda m me whnurnu n'anya, anụ kwé be duwhu anụ. <sup>17</sup> Kpakara nkesi ọma nü nhne bñru ọma neehi n'oligwe naava, n'aka Nda ke keru iwhne, nye zá naagbanwo lele kpa enine naagbanwo. <sup>18</sup> Chiokike pioru o gweru ikwu-ọnou ke ezi ọka a muhia aí, ma a bñru mkpuru mbom ke kpakara nhne o keru eke.

### *Onurnu nü omume*

<sup>19</sup> Rñmu nda m me whnurnu n'anya, anụ mahia ka, kpakara badnụ ziri gnarnagnarna n'onurnu, kóvu o búo n'okwu ọka. O wé masi ehni wara wara. <sup>20</sup> Nye ovu owe ehni nwée rikne mee nhne jaaması Chiokike. <sup>21</sup> Kwnornu nü ka, anụ gweme kpakara rune nü kpakara agwa ojo ke jipihiaru mkpومa anụ. Anụ gweru ehni anụ bita nü mkpururu Chiokike, nahoru ọka wam ke nwernu rikne o znohia mkpuru mkpومa anụ.

<sup>22</sup> Anụ bñru ele neeme nhne ọka wam kwuru, anụ búko ele nñonu ọnou kpoi, needuwhu ehni anụ. <sup>23</sup> Nye ọbula ke nñonu ikwu-ọnou wam kpoi, kóvu o zá neeme eme, nü lele badnụ ke neelekiri ruwhnu a nü nyno, whnụ ruwhnu a kpa o nü, <sup>24</sup> o lekirikwo ehni a, ngangam, o whoga, chezume ọkpa badnụ o bñ. <sup>25</sup> Kóvu nye ọbula ke neelegidne anya n'iwu wam zuru ozu ke neeme badnụ nwernu ehni a,

ke naadazigidne nü rime a, o búo nye noonu ounu neechezu masi, kóvu nye neeme nhne iwu wam kwuru, Chiokike jøogozi nye wam n'érnu a.

**26** O bürü nü nye obula bu nye neekpenu Chiokike, kóvu o knésige riro a eriri, o nooghonu mkpoma a aghigho, okpenu Chiokike a bu nhne etekne. **27** Okpenu Chiokike ke zi snam, ke be mérula emeru nü ruwhnu Chiokike bu Nda aij, bu ka, o chenwanya rümu nwée nda nü nne, nü ele rinya nzi be nwürnu nü mmekpöhni be, nü badnü o biتا ehni a ríchna hite nü nhne ojo k'owá ka.

## 2

### *Ole badnü anya nü ruwhnu*

**1** Rümu nda m, lele ele kweru nü Nyenwe aij Jizoşı Karaısı, nyenwe igwugwu, anü lékó badnü anya nü ruwhnu hite nü ya naakpa ike. **2** O bürü nü nye kwu ke gbagwü arı mkpaka golu, woru iwo marnü mma va n'ögabako anü, nye mboni ke wogwu nkükara iwo va masi, **3** o bürü nü anü sobisinu nye wam wogwu iwo marnü mma, kanü a, "Daziri nü ngadna ka," kóvu kanü wömboni wam, "Gwuzoru hna, móbu daziri n'eli etekne n'ochi m," **4** anü kpála ike, bürü masi ele ikpe oriri ojo marnü?

**5** Anü bnote nsnü, rümu nda m me whnürnu n'anya, Chiokike hörulam ele mboni ke owa ka, mee be bürü ele kwu n'ökwnata ovu be, be bürü masi ele o jeenye əli-eze wam o kweru ele whnürnu a n'anya mkwna. **6** Kóvu anü lednarnü wömboni anya. O búo ele kwu wam neemegbu anü? O búo be noopnurnu anü zne ɔro ikpe? **7** O búo ele kwu noolulu rëwhna ɔma nye wam nwe anü?

<sup>8</sup> O bụru anụ bịa iwu Eze aị ke oligwe ke be gbarụ n'ọkwukwo nsọ, “Whnụ nye agbatibi i n'anya lele ehni i,” anụ mekwarụ nkari. <sup>9</sup> Koyu o bụru nụ anụ le badnụ anya nụ ruwhnu, anụ mehielem. Iwu jeegesi nụ anụ dnarnụ iwu. <sup>10</sup> Nye ọbula ke jaabita kpakara iwu, koyu dna otu kpoi, o dnanam kpakara iwu wam. <sup>11</sup> Kwnornu nụ nye wam karụ, “I mékọ oyi,” kamasiri, “I gbúkọ badnụ.” O bụru nụ i méne oyi, koyu i gburu badnụ, i bụ nye dnarnụ iwu. <sup>12</sup> Anụ kwu, mee masị lele ele Chiokike jeeji iwu ke neeme badnụ nwernu ehni a kpe ikpe. <sup>13</sup> Kwnornu nụ nye nwée mkpoma obirizi, Chiokike jódodonu a obirizi nga o jeeke a ikpe. Obirizi nqonwudna n'ikpe ọmuma.

*Okwnata ovu nwée ẹrnu  
bụ nhne etekne*

<sup>14</sup> Rụmu nda m, ndaa mbnarna ọbnarnu o bụru nụ nye ọbula kaa, “M nwernu m ọkwnata ovu,” koyu ẹrnu a gésile a? Ọkwnata ovu kpoi o jooznohia a? <sup>15</sup> O bụru nụ rụmu nne rukna mọbu rụmu nne rinya nwée iwo, mọbu wiri oriri, <sup>16</sup> mbnarna kini bụ nhne o bnarnụ, o bụru nụ otu badnụ n'esilawuru anụ kanụ a, “Lekwarụ anya, o nyee i iwo i joowo, chi i iyi, nụ wiri i jeeji riji rụwho,” koyu o nyéne a nhne ke zi ano-ehni mkpa. <sup>17</sup> O bụ masị kpa ọkwnata ovu ke nwée ẹrnu bụ nhne nwurnu Ọnwu.

<sup>18</sup> Koyu otu nyenum jaakaa, “Otu badnụ nwernu ọkwnata ovu, nye berere nwernu ẹrnu ọma.” Gesi m ọkwnata ovu i ke nwée ẹrnu, m jeegesi i ẹrnu oma m hite nụ ọkwnata ovu m. <sup>19</sup> I kweru nụ otu Chiokike, o bụru ọma. Ele ręnwu ojo kwe masiri, be naama rururu tụ ogwu. <sup>20</sup> Jị nye iwhnirniwhno!

I pioru ọ mahịa nü ọkwnata ovu ke nwée ẹrnu bụ nhne etekne? <sup>21</sup> Gweru Ebereham nda aị nü nhne atụ. Be gwnüsiri a nü nye mee mma hite n'érnu ọma a, nga o jiri Aziki nnwọ a rukna kwa arıohna n'olu ojo arıohna. <sup>22</sup> I whnurnu nü ọkwnata ovu a nü ẹrnu a rnükotaru ẹrnu. Okwnata ovu a zuru ozu hite n'érnu ọma a. <sup>23</sup> Nhne be gbarụ n'ọkwukwo nsø mezuru ke kwuru, “Ebereham kweruru Chiokike, Chiokike gwnüsingu a nü ọ bụ nya mee mma.” Be sukwu a enyi ke Chiokike. <sup>24</sup> Anụ whnurnu nü be gwnurnu badnụ nü nye mee mma hite n'érnu ọma a, ọ búo hite nü ọkwnata ovu kpɔi.

<sup>25</sup> Kpam masị, gweru Rehabụ nwerinya ewhere nü nhne atụ. Be gwnurnu a nü nye mee mma hite n'érnu ọma, nga o kwubnanyarnụ ele varụ ọ dna ndịdṇa hi n'eli Izireli, zihala be n'apna berere. <sup>26</sup> Lele kpa anọ-ehni bụ nhne nwurnu ọnwu hne enine zíla, kpam masị, ọkwnata ovu bụ nhne nwurnu ọnwu hne ẹrnu zíla.

### 3

#### *Ledu riro i anya*

<sup>1</sup> Rụmu nda m, kpakara anụ búko ele zni nhne. Kwnornu nü anụ magwụ nü ele zni nhne jeenwe agịda ikpe kakwo ele berere. <sup>2</sup> Kpakara aị naadnahie n'agịda nhne. Nye zá naadnahie nü ikwụ-onu bụ nya zuru ozu, nwe masiri rikne ọ chikota kpakara ehni a. <sup>3</sup> A neekne ọnụ iyinya eriri ma be mee nhne a pioru be mee, zne masị hne a pioru be zne. <sup>4</sup> A gweru ọgbo mini lele nhne atụ, ọ bụ n'ezi nü o zị okpotokpo, okne ruwhere noovughari a, koyu nü nye risi ọgbo ji amarna matị nötughari

ogbo penupe ọbula nye risi ogbo pioru. <sup>5</sup> Kpam masị, riro bụ nhne matị zị n'ehni aị, ọ nootu ọka k'agida. Le kpa igbogo hna ezi bụ ke békwnu matị mernu o nwuzo békwnu. <sup>6</sup> Riro bụ békwnu. O jihiaru nụ agida nhne ojo n'esilawuru nhne zị aị n'ehni. Riro bụ nhne neemeru badnụ, noomusi bùdnu békwnu hite nụ békwnu ẹli rẹnwu.

<sup>7</sup> Badnụ nwernu rikne znụ, znụ masilam kpakara nhne be keru eke, mọbu anohia ke zị ogwnu zị ichne ichne, nụ ọnunu ọbula, mọbu aznụ zị nụ mini, nhne ọbula noopnu ọpnu. <sup>8</sup> Kovu nụ ọ zá nye nwernu rikne znụ riro. Ọ bụ nhne ojo ke zá naadazị bidim. Nhne gbu badnụ zị nụ rime a. <sup>9</sup> A ji riro naaznarnị Nyenwe aị nụ Nda aị Chiokike. A ji masị a nọovu badnụ ọnụ bụ nye be kpuru n'oyiyi ke Chiokike. <sup>10</sup> Otu mmamma nụ ọvu ọnụ neehi nụ otu ọnụ wam noowhuya. Rụmu nda m, o bùo ọma ọ zị kpam. <sup>11</sup> Be tufia mini so n'ọnụ nụ mini lu nlulu n'otu ọmi? <sup>12</sup> Rụmu nda m, isisi figi o nwernu rikne miňya mkpuru isisi olivu? Mọbu isisi vajin o nwernu rikne miňya mkpuru isisi figi? Mini arụa, o nwernu rikne gbahịa mini so n'ọnụ?

### *Akọniche zị ichne ichne*

<sup>13</sup> Ọ bụru nụ o nwernu nye zị n'esilawuru anụ ke nwernu akọniche nụ oghohia, o gesi a hite nụ bùdnu a, hite masị nụ agwa ọma nụ ogwedna ehni a ẹli ke hi n'akòniché. <sup>14</sup> Kovu ọ bụru nụ mkpومa anụ jihiaru nụ okwno-awụwa, nụ ovu nlulu, nụ aka-nchnị, anụ kpá nganga. Anụ mée ezi ọka ghọ aghalaghala. <sup>15</sup> Akòniché ke nụ kpam híge n'oligwe va, ọ bụ ke ọwa. Enine Chiokike zìla nụ rime a. Ọ bụ nhne ke rẹnwu ojo neezni. <sup>16</sup> Hne okwno-awụwa

nü okewa zi, ṥogba aghara ghara jaaziri. <sup>17</sup> Koyu akoniche ke hi n'oligwe va, beru ọsno ziri rịchna, omekwo, o nwe udno, o nwernu mkpoma ọma, naadnakota n'otu, o nwernu obirizi nü ẹrnu ọma, o nwée aghigho, ọ kwu ezi ọka. <sup>18</sup> Ele neeme udno naakpa mkpuru udno. Be jøoghohia mkpuru ke imerne ọma.

## 4

### *Enyi ke ọwa*

<sup>1</sup> O bụ kini noovuya ọlu ogwnu nü ọdogbuta n'esilawuru anụ? Be hi nü nhne ọjo ke nọogwnu mkpoma anụ, ke nọolu ọgwnu nü rime anụ. <sup>2</sup> Anụ pioru nhne, koyu anụ nwéhịala a, anụ jiknernu o gbu badnụ. Anụ piosi nhne rikne, anụ nwée rikne nwehịa be, anụ jiknernu nọodogbuta, nọolu ọgwnu. Anụ nwée nhne anụ pioga kwnornu nü anụ ríola n'aka Chiokike. <sup>3</sup> Anụ nọorio, koyu anụ zá nanahịa kwnornu n'oriri ọjo ke mkpoma anụ, ma anụ gweru a mee kpa o jiri masị anụ.

<sup>4</sup> Anụ ele kwé be tukwasi anụ ovu! Anụ máa nü nye ọbula ke whnurnu nhne ọwa n'anya k'agida nye wam bụ nye irno ke Chiokike? Nye ọbula ke pioru o bụ enyi ke ọwa neeme ẹhni a nye irno ke Chiokike. <sup>5</sup> Anụ chékọ nü nhne be gbarụ n'okwukwo nsọ bụ etekne, “Chiokike neelegidne Enine Nsọ a o yisiri nü rime anụ anya k'agida.” <sup>6</sup> Koyu Chiokike neenye aị oru k'agida. Lele kpa be gbarụ a n'okwukwo nsọ, “Chiokike noogwuzogidne ele oknomokno, koyu o neenye rụmu mboni oru.”

<sup>7</sup> Anụ bitä ẹhni anụ nü mkpururu Chiokike. Anụ nyigidne Ekwensu, ọ jaagbawhu hne anụ zi. <sup>8</sup> Anụ

kpayabetü Chiokike ndündu, o jaakpayabetü anü ndündu. Anü kwnosnama aka anü, anü ele aruru-eli. Anü snüsnama mkpoma anü, anü ele mkpoma lawürü. <sup>9</sup> O gbu anü igbugbu, anü ru ọwa, anü gba mkpe! Rụmu anü ghọ erekwana. Snarnıma anü ghọ ọ gbaru ruwhnu. <sup>10</sup> Anü gwedna ehní anü nü ruwhnu Chiokike, o jeegwelizö anü olu.

### *Anü kpékọ ibne anü ikpe*

<sup>11</sup> Rụmu nda m, anü kája ibne anü. Nye ọbula ke naakaja nnwọ nda a, mọbu neekpe a ikpe, o naakaja iwu, neekpe masi iwu ikpe. O bürü nü i bụ nye neekpe iwu ikpe, ngam, i bùo nye naabita iwu, koyu nye ikpe iwu. <sup>12</sup> Chiokike kpɔi bụ nye neenye iwu nü nye ikpe. Ya nü nsnunu a nwernu rikne znohia aị mọbu gbumekwo aị. I bụ nyele ke neekpe badnụ ibne i ikpe?

### *Anü lúu ọnụ nhne ekile jọobu*

<sup>13</sup> Anü bnote nsnị, anü ele naakaa, “Tna mọbu ekile, a jeezne mba ka mọbu mba kiyari daziri pii otu awha, gba mgbama ahịa, kpa agida ịwai.” <sup>14</sup> Anü māa nhne jeeme ekile. Ndaa nhne bùdnu anü bụ? Bùdnu anü nü lele iknorno-mini ke whụyaru, dazi ige matị, omekwo, o whume n’anya. <sup>15</sup> Ka bụ nhne anü znernu okwu, “O bürü o masi Nyenwe aị, a jaazi bùdnu mee ka mọbu mee kiyari.” <sup>16</sup> Koyu kịtna, anü noolu onu, neeme oknomokno. Kpakara o luu ọnụ ka bùo ọma. <sup>17</sup> Nye mahiaru nhne bürü ọma o mee a, o méne a, o bùnnu a mmehie.

## 5

*Be dɔru ele eze aka  
nụ nsnị*

<sup>1</sup> Anụ bnote nsnị, anụ ele eze. Anụ kwna erekwna, si okokoba kwnornu nụ nhne igbugbu ke jaadnakwasị anụ. <sup>2</sup> Ekwnu anụ roru oro, akịka takwolem iwo anụ. <sup>3</sup> Kpakara golu nụ siliva anụ tülam ajari, ajari a jojobu nhne akebne megidne anụ. O jeerne anọ-ehni anụ lele békwnu, anụ ele kpabitaru erekwnu n'obochi ipne-aznụ ka. <sup>4</sup> Anụ bno nsnị, anụ kwúla ele anụ gnornu ेrnü n'ekwu anụ ögwo ेrnü be. ögwo ेrnü be naakwna, nhne o nqokpokwu anụ dülam nsnị Nyenwe aị Chiokike ke Meli Nhne Dum. <sup>5</sup> Anụ wuru bjudnu oriri nụ ọnwunwo n'owa, anụ mee lele kpa o masiri anụ. Kitna, ehni anụ ke gbarụ oto jiknernunem, neese ikpe naava ava. <sup>6</sup> Ele aka be zị ríchna bụ ele anụ marnụ ikpe, anụ gbu be. Be ménne anụ risi rikne.

*Osнuta mkpoma  
nụ mmekpehlerni*

<sup>7</sup> Rümü nda m, anụ knata mkpoma tem Nyenwe aị va. Nye ेrnü erekwu ji naaknata mkpoma nụ mkpuru zị okne onu ahịa ke erekwu a mị, tem mini ozuzo mbom nụ ke ipne-aznụ zo. <sup>8</sup> Anụwa masi, anụ knata mkpoma, dazisi rikne, kwnornu nụ ọvuva ke Nyenwe aị zị ndündu. <sup>9</sup> Rümü nda m, anụ nwéma mkpoma ojo n'ehni ibne anụ, ma Chiokike gharụ o kpe anụ ikpe. Nye ikpe gwuzogwu n'onumgbo jiknernu o va. <sup>10</sup> Rümü nda m, anụ chenwanya nhne ele ọwhnurninya kwuru nụ ręwhna Nyenwe aị. Anụ gweru be lele nhne atụ nụ ọknata mkpoma nụ rime mmekpehlerni. <sup>11</sup> Anụ maam nụ

a nookwu ele wam ele ọwa ọma kwnornu nụ be knatarụ mkpoma. Anụ nurnu ọknata mkpoma Jobu, anụ maam nụ Nyenwe aị dọnnu a obirizi n'ipne-aznụ, kwnornu nụ Nyenwe aị bụ nye obirizi nụ nye imerne ọma.

<sup>12</sup> Rumu nda m, anụ jí oligwe mọbu ọwa mọbu nhne berere dụ risi. Ọka anụ bụru owe, owe, mọbu óza, óza, o zị Chiokike kpe anụ ikpe.

### *Okpukpe be kperu n'okwnata ovu*

<sup>13</sup> O zị nye ọbula n'esilawuru anụ ke zị nụ mmekpēhni? O kpe okpukpe. O zị nye ovu nooso n'önü? O gwnụ eri ọznarni. <sup>14</sup> O zị nye ọbula ke naaria ehnị igbugbu? O sukwu ele okno badnụ ọgbako Chiokike, be kpenu a okpukpe, te a mono olivu nụ rəwhna Nyenwe aị. <sup>15</sup> Okpukpe be jiri ọkwnata mkpoma kpe jøogwo nye nriria wam. Nyenwe aị jeeme ehnị si a rikne. O bụru nụ o mehieru, Chiokike jaagbarunu a. <sup>16</sup> Kam kpa-yaru, anụ kwuhianu ibne anụ mmehie anụ, anụ kpenu ibne anụ okpukpe ma be gwọ anụ ehnị igbugbu anụ. Okpukpe nye mee ọma nqornusi ेernu rikne. <sup>17</sup> Elaija bụ badnụ etekne lele aịwa. O kpésiri okpukpe rikne ma mini gharụ o zo, mini zóle dụ awha ẹto nụ ẹnwa isunu. <sup>18</sup> O kpe kwno okpukpe, oligwe gweya mini ozuzo, ẹli mịnya mkpuru. <sup>19</sup> Rumu nda m, o bụru nụ otu badnụ n'esilawuru anụ kpahalarụ n'apna ezi ọka, nye berere kwuhnahie a, <sup>20</sup> anụ mahia nụ nye mernu nye ojo tñhnasna n'apna ojo a, znqhiaru mkpoma a n'ènwu. Nye wam kpusnirni agịda mmehie.

## **Tesitamenti Ikne n'Onu Ikwere New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre – (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

### **Copyright Information**

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

### **The New Testament**

in Ikwere

© 2010, The Nigeria Bible Translation Trust.  
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 21 Feb 2024 from source files  
dated 29 Jan 2022

c17ee3a1-1c7a-5c05-8e0f-5043e8228d89